



Број/Број: 01/2-50-3-2-28/13

03/4,03/11-05-1-353/12

Сарајево/Sarajevo, 8. 1. 2013.

ZABILJEŠKA

sa sastanka članova Komisije za vanjske poslove Predstavničkog doma PSBiH s delegacijom Parlamenta Njemačke (Bundestaga)

Sastanak članova Komisije za vanjske poslove Predstavničkog doma PSBiH s delegacijom Bundestaga održan je 8. 1. 2013. U ime Komisije za vanjske poslove sastanku su prisustvovali: predsjedavajući Komisije Mirza Kušljugić i član Mladen Ivanković Lijanović. U delegaciji Bundestaga bili su: Josip Juratović, Rainer Arnold i Axel Schneider, te predstavnik njemačke ambasade u BiH.

Mirza Kušljugić je na početku pozdravio delegaciju Bundestaga i poželio im dobrodošlicu u ime Komisije za vanjske poslove Predstavničkog doma PSBiH. Naglasio je kako je upoznat da je delegacija Bundestaga već imala susrete s drugim komisijama, u Predsjedništvu BiH i s predstavnicima određenih stranaka, te da u ime ove komisije iscrpnije može govoriti o ekonomiji, konkretnije energetici i infrastrukturi, a Lijanović Ivanković o poljoprivredi i prehrambenoj proizvodnji što je u užoj kompetenciji članova naše delegacije.

Josip Juratović kao šef njemačke delegacije iskazao je zahvalnost za susret i mogućnost razmjene mišljenja te upoznao članove Komisije da su na prethodnim sastancima upoznati s radom na izmjenama Ustava BiH i provođenju odluke u predmetu Sejdić i Finci protiv BiH, te ekonomskim pitanjima na koja i ovdje žele staviti naglasak. Ističući važnost državne organizacije, sistema države, Juratović je posebno naglasio važnost socijalne sigurnosti koje nema bez ekonomskog razvoja. Naročito je iskazao nerazumijevanje, neshvatanje da se u deset godina na glavnoj žili razvoja privrede BiH, Koridoru 5c, tako malo uradilo. Autoput se ne gradi, ne postoji državna strategija ekonomskog razvoja kojeg nema bez razvoja infrastrukture. Koja je ekonomska strategija BiH, osim infrastrukture, kakvo je stanje s obrazovanjem, dokvalifikacijom, usavršavanjem, pitao se, budući da političari često traže investicije u BiH, ali šta je sa sigurnošću vlasništva, imovine, kako stoje stvari s katastrom, zemljišnim knjigama, te sa sigurnošću ulaganja.

Mirza Kušljugić upoznao je njemačku delegaciju da BiH nema državnih strategija, pa tako ni privrednu i po tome je jedinstvena u Evropi, a nema ih jer nema političke volje da se strategije naprave i usvoje, premda je to obaveza BiH. U BiH možda čak i nije neka tragedija što nema strategija, jer BiH mora svoje infrastrukturne ili energetske strategije raditi na nivou regiona kojem pripada, budući da se o tim strateškim koridorima, energetske ili putnim, odlučuje na nekim drugim, višim nivoima. Međutim, ako se nema nikakav papir, onda se zaista ne zna kuda se ide. A 2013. godina prilika je da se s popisom stanovništva konačno sazna ko smo, koliko nas ima, da se usmjerimo na industrijski razvoj, na naše sektorske strategije, a sve u pripremi IPA programa 2014.-2020. IPA programi bit će otvoreni za BiH bez obzira na status BiH, ali oni neće ići kao do sada na osnovu programa nego na osnovu sektorskih strategija i akcionih planova. Proces evropskih integracija natjerat će BiH da počne sistemski upravljati vlastitim razvojem, koliko uopće zemlja ove veličine, ovog potencijala i s ovakvim problemima može sistemski upravljati svojim razvojem. Što se tiče

Koridora, Kušljugić je naglasio da je danas situacija drugačija nego prije šest mjeseci ili godinu. Direktno strane investicije drastično opadaju, pa je jedini odgovor na to da javni sektor počne ulagati u infrastrukturu, ovdje u Koridor i energetiku, a to je itekako prisutno. U sektoru energetike tu su i njemačke firme, one itekako pokazuju zanimanje za taj segment privrede. Možda u svemu tome može imati efekta i činjenica da će se od 1. jula granica Evropske unije približiti BiH, s kojom će ona graničiti na više od hiljadu kilometara.

Mladen Ivanković Lijanović naglasio je da se BiH kao mala, ekonomski i politički nejakna zemlja u sve integracije može uključivati samo pod tuđim uslovima, budući da ne može ostati izolirana. Nije po tome jedina i to nije obeshrabrujuće. Što se tiče strategije, nije problem u njoj, problem je u nedostatku političke volje. Entiteti imaju pravo i ovlaštenje za stvaranje poslovnog ambijenta, a državi u tom smislu pripada koordinirajuća uloga. Što se tiče Koridora, napravljen je veliki pomak, jer je već ugovoreno oko 150 km autoputa, što je pola od onoga što Federacija BiH ima i to bi trebalo biti isprojektirano do 2014., a završeno do 2018.-2019. Što se, pak, tiče poljoprivredne politike, ona bi trebalo da bude jedinstvena i tu značajnu ulogu ima državni nivo, jer se sredstva iz EU mogu povlačiti samo ako je konstituirana jedinstvena poljoprivredna politika. Radi se i na pripremi za izvoz proizvoda biljnog i životinjskog porijekla u EU, ali nijedna zemlja se nije obogatila na poljoprivrednoj proizvodnji, budući da poljoprivreda traži dodatno ulaganje i subvencioniranje. No, na tome treba bazirati uslužne djelatnosti i turizam i u njih ulagati, u mala i srednja poduzeća, obrt i industriju, u ono gdje BiH može dati doprinos, i taj dio privrede treba stimulaciju i rasterećenje od nameta i birokratije. Za sve to je potrebna i racionalizacija državne uprave koja u BiH ima više nivoa i koja je opterećujuća za racionalno poslovanje. Posebno će se to tražiti za Federaciju BiH, te u vezi s tim raditi na jačanju lokalne zajednice i poduzetništva.

Josip Juratović iskazao je zadovoljstvo time što je mogao čuti kako postoji napredak u izgradnji infrastrukture kao i pomaci u ekonomskom razvoju. Potpuno je svjestan da je BiH uključena u dio regionalnog razvoja. Zato i postoji CEFTA i zainteresiran je da čuje kako BiH saraduje u okviru tog programa.

Mirza Kušljugić ukazao je na teškoće u provođenju CEFTA-e u BiH, jer su susjedi BiH postavljali administrativne netržišne barijere za proizvode iz BiH, posebno u domenu poljoprivrede. Nisu one, te barijere, bile protiv CEFTA-e, ali jesu pokazale da BiH nema institucije kojima može odgovoriti na njih. Jedine institucije koje mogu odgovoriti na administrativne barijere su institucije BiH, čiji su razvoj i jačanje bivali spriječeni političkim razlozima. Dobra strana problema s CEFTA-om je trenutna politička saglasnost vladajuće parlamentarne većine da se moraju razvijati državne institucije koje bi omogućile ravnopravan položaj svim privrednim subjektima u BiH sa susjedima. Kako će se cijeli problem s CEFTA-om dalje razvijati nakon ulaska Hrvatske u EU značajno će zavisiti i od toga koliko će BiH razvijati svoje institucije neophodne za administrativno servisiranje režima otvorenog tržišta. Konkretni primjer je velika mogućnost ekonomskih aktivnosti na Kosovu, a politički problemi ih čine nemogućim, tako da su ekonomski odnosi Srbije i Kosova bolji od onih koje imaju BiH i Kosovo. A administrativne barijere postavlja BiH sama sebi, papirama, dokumentima, (ne)priznavanjem i slično. BiH, međutim, ne treba ništa više u ekonomskim odnosima s Kosovom nego ono što u osnovi ima Srbija, budući da je riječ o CEFTA-i, dodao je Kušljugić.

Josip Juratović zahvalio je na veoma informativnoj razmjeni mišljenja, naglašavajući potrebu jače regionalne saradnje, gdje je CEFTA preduslov ulaska u EU, jer, naglasio je, teško je biti partner u ipak velikoj Evropskoj uniji, ako ne postoje regionalni partnerski odnosi. Za privredni razvoj BiH itekako je potrebna i važna kvalitetna privredna regionalna saradnja. Juratović je iskazao zadovoljstvo i budućom saradnjom i razmjenom mišljenja između parlamenata dvije zemlje.

Mirza Kušljugić iskazao je zadovoljstvo intenziviranjem susreta članova dva parlamenta u posljednje vrijeme. To se poklapa i sa željom Komisije za vanjske poslove Predstavničkog doma i Parlamentarne skupštine BiH za intenzivnije uključivanje u euroatlatske integracije. Na BiH je da konkretizira sve ono što se putem parlamenata u tom smislu može pokrenuti. BiH već ima određene aktivnosti u regionu, posebno u saradnji komisija za vanjske poslove BiH, Crne Gore, Hrvatske i Srbije, nakon čega bi se išlo prema institucijama EU i zemljama prijateljima, onima koji su zainteresirani za razvoj regiona. Potez je ipak na BiH, jer beskonačne uzajamne posjete bez konkretnih akcija neće donijeti konkretne rezultate. Njemačka je najveći bosanskohercegovački izvozni partner, a u BiH se očekuje da ona bude i najveći investitor ovdje, a sve s ciljem razvoja i popravljanja ekonomske, pa s njom i socijalne sigurnosti u BiH.

Predsjedavajući Komisije

Mirza Kušljugić

Dostavljeno:

- Kolegiju Predstavničkog doma
- članovima Komisije za vanjske poslove Predstavničkog doma PSBiH
- članovima Komisije za vanjsku i trgovinsku politiku, carine, saobraćaj i komunikacije Doma naroda PSBiH
- Sektoru za međunarodne odnose i protokol
- Ministarstvu vanjskih poslova BiH
- a/a